

LAN ETA ETXEBIZITZA ALORRETAN DITUZTEN ZAILTASUNAK SALATU DITUZTE EUREN EGUNEAN

Ukatzen dizkieten eskubideak aldarrikatu dituzte gutxitu fisikoek

■ Gutxitu fisikoen nazioarteko eguna ekarri zen gogora atzo. Bizimodu normalizatua egin ahal izateko prestatutako etxeak eskatu dituzte, eta lantegiek legeaz aginduak dituzten postuak gorde dizazkieten. Administrazioaren utzikeria salatu dute.

Erredakzioa / Donostia

NAZIOARTE zabalean gutxitu fisikoek dituzten arazoak ekarri zituzten atzo gogora, baita gurean ere. Euskal Herrian 200.000 gutxitu fisiko pasa daude, eta, oraindik ere, gainontzekoen pareko bizimodua egiteko arazo handiak izaten dituzte. Gutxitu fisikoen arabera, integrazioa eta normalizazioa lortzeko urrats handiak egin behar dira oraindik ere, gizartean oro har baina batez ere administrazioan. Haien arabera, erakunde publikoek, sarri, utzikieriaz jokatzaren dute.

Hain zuzen ere, erakunde publikoen jarrera hori salatu zuten atzo Araba, Bizkaia eta Gipuzkoako Gutxitu Fisikoen Ekarteak. Azpimarratu nahi izan zuten administrazioak euren eskubide zenbait ukatu egiten dizkietela, batez ere etxebizitza eta lan arloetan.

1982 urtean onartu zen enpresek euren lanpostuen %3 elbarrituentzat gorde behar zituztela agintzen duen legea. Ehuneko hori, ordea, oso-oso kasu gutxitan betetzen da; enpresa askok eta askok lanpostu bakar bat ere ez dute gordetzen arazo fisikoak dituzten gizon eta emakumeentzat. Arazo horren aradura, baina, enpresa horiena baino gehiago administrazioarena dela salatu zuten atzo gutxitu fisikoek; izan ere, erakundeek, utzikieriaz, ez baitute legeak dioena betearazten. Horrek guztiorrek eraginda, talde horretan, langabezia tasa %60 ingurukoa da.

Lanaz gain gutxitu fisikoek etxebizitzarena dute arazorik handiena. Atzo EAEko Gutxitu Fisikoen elkarteak jakinarazi



Ezindu fisiko bat konferentzia bat entzuten, artxiboko irudian.

XOUSE SIMAL

zutenez, ezintasun fisikoengatik aulki gurgildunetan dauden gazte askok aiton-amonekin bizi behar izaten dute instituzioen egoitzetan, beraientzat propio egokitzen den etxebizitzarik ez dagoelako.

Horrezaz gainera, etxetik kanpo, oraindik ere txoko gutxietan

egiten dute topo muga arkitektonikoekin. Eusko Legebiltzarrak amaitu beharri den legegintzaldian onartu zuen Irigarritasun Legea, gutxitu fisikoentzat mugak ezabatu asmo dituen. Oraindik, baina, irigarritasuna erabateko izateko asko falta da, eta legeak dioena betearaz dezan

exijitu diote, ildo horretan, administrazioari.

Azken batean, gutxitasun fisikoak dituzten pertsonen gizartean integrazioa lortzea dute helburu, gainontzekoen moduan bizitzea. Eta helburu hori betetzeko denek elkarlanean jarraituko dutela azpimarratu dute.

Pertsona bat hil eta beste hiru lagun zauritu dira Muruetan, auto istripu larrian

■ Zestoan, zortzi urteko neskatik bat hil zen atzo auto batek harrapatuta

Erredakzioa / Donostia

MURUETAN (Bizkaia) pertsona bat hil zen atzo arratsaldean gertatutako auto istripuan. Ezbehar berean, beste hiru lagun larri zauritu ziren.

Ertzaintzak emandako informazioaren arabera, istripua arratsaldeko zazpiak pasa zirela gertatu zen, Bi-635 errepidean. Ez jakin nola, bi autok (BMW 535 eta Opel Corsa bana) aurrez aurre jo zuten elkar. Kolpearen ondorioz, Opelean zihoan pertsonetako bat momentuan hil zen.

Beste hiru pertsona, berriz, harrapatuta geratu ziren burdinen artean. Handik atera zituztenean ospitalera eraman zituzten, egoera larrian.

Bestalde, Zestoan, zortzi urteko neskatik bat hil zen autobus batek harrapatuta. Herrizaingo Saileko informazioaren arabera, arratsaldeko ordu biak eta erdiak ziren ezbeharra gertatu zenean. Neskatoa, berehalakoan, Donostiako Andre Mariaren erresidentziara eraman zuten buruan kolpe handia zuela. Haren bizitza salbatzeko bertan egin zituzten ahalegin guztiak, ordea, alferrikakoak gertatu ziren. Arratsalde erdian hil zen.

Ertzaintzak ezbehar larri horren lekukoak eskatu ditu, istripua nola gertatu zen zehaztasunez jakin ahal izateko. Gertatutakoa ikusi zutenei Ertzaintzako Argibideak saileira deitzeko (943 44 91 25 telefonoa) edo Azkoitiko komisariarekin (943 81 60 00) harremanetan jartzeko eskatu diete. X

Integrazio eta normalizazio politika aldarrikatzeko manifestua

EAEko Gutxitu Fisikoen Konfederazioko ordezkariak honako manifestu hau irakurri zuten atzo Gernikako Arbolaren azpian, gaur egun kolektibo hori «jasaten ari den bidegabekeria soziala konpontzeko ondorengo eskari hauek bete behar direla aldarrikatzeko»:

- ✱ **Zerbitzuak koordinatu:** Zerbitzu eta baliabide sozio-komunitarioak planifikatu eta koordinatu pertsona guztiek parte hartu ahal izan dezaten.
- ✱ **Irigarritasuna bermatu:** Irigarritasunaren Sustapenerako Legea betearaztea, garraioetako eta komunikaziorako oztopo fisikoak ezabatzea. Horrela bazterketarik gabeko ingurua lortu hala izango dugu.
- ✱ **Lan arloan legea betearazi:** Lan arloan indarrean dagoen legea betetzen dela ziurtatzea lan baldintzak gutxitasunen bat duen pertsonari egokituz.
- ✱ **Prestakuntza normalizatua ahalbidetu:** Gure kolektiboa integrazio sozial eta laboralera zuzendutako prestakuntza programa normalizatuetan sartzea ahalbidetzea.
- ✱ **Aisialdirako baliabideak:** Beharrezko baliabideak ahalbidetzea

aisialdi eta denbora libreko jarduerak planifikatu eta bertan parte hartzeko, eta horrela, kultur, kirol eta atsedeneko zerbitzu publikoetan parte hartu ahal izateko.

- ✱ **Oinarritzko beharrak estali:** Pentsio eta laguntza ekonomikoak ezartzea lan jarduerarik bete ezin duten edo nahi gabeko langabezia egoeran aurkitzen diren gutxitu fisiko guztien oinarritzko beharrei aurre egiteko.
- ✱ **Etxebizitzaren arazoa konpondu:** Egoitzen arazoei eta etxeko etxeko laguntzari irtenbideak aurkitzea, normalizatutako bizitzaren irizpide minimo batzuekin eta ez ghettoen moduan.
- ✱ **Osasun laguntza eredu sortu:** Osasun laguntza eredu sortzea, prebentzio, sustapen, laguntza eta errehabilitazio funtzioak garbi dituen, bai indibidualki eta bai gizarte taldeka ere, irtenbideak bilatuz eta ez aurrekontuak murrizteko politika euskal gizartean. X



**Hondarribiko
Udala**

IRAGARKIA

1998ko abenduaren 1eko 1038/98 zenbakia duen Alkate Dekretuz, H.I.A "44. Labreder"eko Antolamenduko Egitasmo Partzialaren proiektuari hasierako onepena eman zitzaion eta hamabost lanegunez jendaurrean erakutsiko da, Gipuzkoako Aldizkari Ofizialean eta "El Diario Vasco" eta "Euskaldunon Egunkaria" egunkarietan azken iragarkia argitaratzen den bihamunetik kontatuta, aipaturiko epearen barruan edonork Udaletxeko Bulego Teknikoan aztertu eta erasandakoek bidezko deritzan alegazioak jarri ahal izango dituztelarik.

Hondarribia, 1998ko abenduak 1.
ALKATEA, Borja Jáuregui Fuertes.